

咸

賓

錄

咸賓錄西夷志卷之五

明豫章羅曰聚尙之父著

吐蕃

吐蕃凡百餘種古曰西戎又曰西羌其先出自三苗國近南岳今荆楚溪洞中往往有竊發爲亂者詢之多爲苗姓大抵其遺種也舜時徙三苗於三危山三危去肅州數百里南接蜀漢徼外蠻夷西北接高昌諸國俗子妻母弟納嫂故國無鰥寡種類繁熾昔成湯伐畎夷武丁伐鬼方季歷伐西洛余無始呼翳徒諸戎在文王時戎狄賓服武王時羌髡率師會於牧

野宣王時戎殺秦仲秦莊公破之幽王時申侯與戎共攻殺王秦襄公伐之戎所從來久矣及平王遷都洛邑避犬戎難於是戎逼諸夏自隴山以東及乎伊洛往往戎夏雜居焉故有狄獯戎邽冀戎義渠戎大荔戎驪戎陸渾戎陰戎蠻氏戎伊洛間有楊拒泉臯戎春秋時間在中國與諸夏盟會邽冀戎魯莊公滅之驪戎晉獻公滅之是時伊洛戎強侵曹魯入王城秦晉伐之後二年復與襄王弟叔帶謀伐襄王齊桓公使管仲平之嗣後秦晉楚趙強盛穆公得由余而霸西戎悼公使魏絳和諸戎蠻氏從楚陸渾伊洛陰

戎事晉趙滅北夷秦滅大荔戎其遺脫者皆逃走西
踰汧隴於是中國無戎寇惟隴義渠種焉義渠勢力
强悍築城稱王秦輒爲其敗困秦昭王時義渠王朝
秦因與昭王母宣太后通生二子後宣太后誘殺義
渠王因起兵滅之始置隴西北地上郡焉至兩漢時
而西戎之種復盛先是戎人有爰劍者不知其出自
何戎或云舜封少子於戎地此其遺裔非三苗種也秦厲公時執爰劍爲奴
隸後亡歸偶與剽女遇於野遂爲夫婦女耻其狀被
髮覆其面羌人因以爲俗相與亡入賜支河湟間諸
羌推以爲豪於是教羌田畜種人依附者日衆爰劍

久四世有曰忍曰舞曰卬者竝多納婦子各十餘各

自爲種自是苗裔漸熾至有百五十餘種或在賜支

河西或在蜀漢徼北其名號難以盡述也而中惟燒

當先零鍾羌參狼爲最強餘種特依之爲寇而已燒

當者忍第十四世孫也最豪健故其子孫世以燒當

爲種號云後始皇築長城及漢武築今居塞置張掖

古匈奴昆邪王地漢置張掖郡今爲甘州衛酒泉古月支地漢置郡今爲肅州衛燉煌古瓜

州地漢置燉煌郡唐分爲瓜沙二州元失瓜州置沙州路本朝初置沙州衛正統中徙其衆于內地但名

存而武威古匈奴休屠王地漢置郡宋西涼府今涼州衛四郡隔絕羌胡於

是西垂得安而終燒當之身及其玄孫滇良累世服

從獨先零結諸羌數數爲寇抄不絕追趙充國降先
零馮奉世降彡姐等羌四夷賓服者數十年王莽篡
位羌復入寇至附隗囂與漢相拒矣建武中來歙馬
援等破降之徙置天水隴西扶風三郡中元初燒當
羌滇吾與弟滇岸寇隴西塞滇吾者滇良子也輒討
之不能克至永平初竇固馬武等大破之無何滇岸
滇吾降詣闕獻見而滇吾子東吾東吾子東號東號
子麻奴俱入居安定世世奉約束如故獨東吾諸翁
迷吾號吾等結諸羌數數爲寇頃之或降或滅勢亦
未至甚猖獗也至永初中諸降羌苦于豪吏徭役故

麻奴逃出塞而諸亡羌轉相囑聚遂附滇零鍾羌諸種大肆寇掠揭木爲兵負柴爲械轂馬揚埃郡縣畏懦不能制更招集參狼上郡西河諸種東犯趙魏南入益州遂寇三輔斷隴道破郡縣滇零自稱天子於北地雖鄧騭任尚任仁段熲段崇等討之漢兵輒挫殺掠大慘自西戎作逆未有陵斥上國若斯其熾也及滇零歿子零昌立年幼小而同種狼莫爲其計策輒入寇我輒討之無功而任尚用虞詡計輕騎擊之又張喬招誘叛羌稍稍詣降時効功種名號封者刺殺零昌封王全無種名雕何者刺殺狼莫封侯而號

多與當前勒姐共脅諸種寇掠巴漢者賴程信并板
楯蠻兵擊破之於是諸羌瓦解三輔益州無復寇敵
矣迨永寧以後諸羌復結麻奴入寇而鍾羌又數反
頃之皆降馬賢之功居多及馬賢戰沒東西羌復大
合而燒當先零沈氏牢姐諸種相繼入寇頃之或降
或滅段熲之功居多自是厥後其種號世次莫可得
而考矣至西晉懷帝時有赤亭羌姚弋仲者乃爰劒
之苗裔也東徙榆眉戎夏祿負從之者數萬而于襄
及萇俱豪邁多勇略弋仲病謂其子襄曰中原無主
我死你亟自歸於晉無爲不義也及卒而襄遂率衆

來歸詔屯譙城會殷浩惡其強盛屢遣刺客刺之不
諧又潛遣魏憬襲襄不克襄心銜之未發也無何浩
伐秦以襄爲前驅襄僞遜伏甲邀之反攻浩於山桑
浩大敗歸免爲庶人復以栢溫督諸軍討襄襄連戰
敗退奔平陽招納叛民輒有圖關中之志秦遣兵攻
擊斬襄襄弟萇以衆降秦先是燕慕容暉降秦秦遷
暉并鮮卑衆四萬餘戶於長安及慕容泓起兵收集
鮮卑衆其勢遂盛秦遣苻融擊泓以姚萇爲司馬佐
之萇諫融曰鮮卑皆有思歸之志故起而爲亂宜驅
令出關不可遏也融勿從果敗歿堅大怒欲殺萇萇

遂奔渭北糾扇羌豪五萬餘家推萇爲盟主萇自稱
爲秦王羌胡降者十餘萬會秦苻堅攻西燕敗奔五
將山萇遣人縊殺之遂取長安稱帝號而勢赫然盛
矣萇卒子興立興卒子泓立泓爲人孱弱無祖父風
劉裕遣王鎮惡討之不戰而潰遂降裕至長安送泓
詣建康斬之而姚秦氏亡在魏晉初西羌之地爲東
胡吐谷渾所併語具元良哈志中至隋吐谷渾衰時
西羌地有党項有大羊同有鄧至有宕昌有悉立有
章求拔有泥婆羅有蘇毗有白蘭有吐蕃惟党項吐
蕃爲大唐初諸種盡爲吐蕃所併其地皆屬吐蕃矣

吐蕃者祖曰鶻提勃悉野未詳何種或曰南涼禿髮
利鹿孤之後二子曰樊尼曰僊檀僊檀嗣爲乞佛熾
盤所滅樊尼挈殘部臣沮渠蒙遜以爲臨松太守蒙
遜滅樊尼率兵西濟河逾積石遂撫有羣羌云其俗
謂彊雄曰贊丈夫曰普故號君長曰贊普不知幾傳
而至弄贊亦名棄蘇農亦號弗夜氏其爲人慷慨才
雄常驅野馬犂牛馳刺之以爲樂西域諸國共臣之
太宗貞觀八年始遣使者來朝帝遣行人馮德遐下
書臨撫弄贊聞突厥吐谷渾竝得尚公主乃遣使齎
幣求婚帝不許使者還妄語曰天子遇我厚幾得公

王會吐谷渾王入朝遂不許殆有以間我乎贊怒
率羊同共擊吐谷渾吐谷渾不能亢交青海之陰盡
取其貲畜又攻党項白蘭羌破之勒兵二十萬入寇
松州命使者貢金甲且言迎公主謂左右曰公主不
至我且深入都督韓威輕出覘賊反爲所敗屬羌大
擾皆叛以應唐乃遣侯君集執失思力牛應達劉蘭
等四道出兵討之斬首千級弄贊始懼引而去以使
者來謝罪固請婚許之遣大論薛祿東贊獻黃金五
千兩它寶稱是以爲聘十五年妻以宗女封文成公
王詔江夏王道宗持節護送弄贊率兵次柘海親迎

見道宗執婿禮恭甚見中國服飾之美縮縮媿沮歸國自以其先未有昏帝女者乃爲公主築一城以夸後世遂立宮室以居公主惡國人赭面弄贊下令國中禁之遣諸豪子弟入國學習詩書又請儒者典書疏永徽初弄贊死無子立其孫幼不事故祿東贊相其國頃之破吐谷渾慕容諾曷鉢與弘化公主引殘落走涼州踰年祿東贊死其子曰欽陵曰贊婆曰悉多曰勃論祿兄弟竝當國自是歲入寇盡破有諸羌羈縻十二州復入羈縻十八州率于闐取龜茲撥換城於是安西四鎮竝廢詔遣將薛仁貴阿史那道真

等出討吐蕃并護吐谷渾還國師凡十餘萬至大非
川爲欽陵所拒王師敗績遂滅吐谷渾而盡有其地
高宗上元初遣大臣論吐羅渾彌來請和且求與吐
谷渾修好帝不聽明年攻鄯廓河芳疊扶六州唐遣
將李敬玄李孝逸劉審禮等擊之皆無功黑齒常之
率死士五百夜斧其營虜驚自相輜藉而死者甚衆
乃引去儀鳳初大首領贊婆素和貴率兵三萬攻河
源屯良非川敬玄與戰湟川敗績黑齒常之以精騎
三千夜擣其營贊婆懼引去遂擢常之爲河源經略
大使乃嚴烽邏開屯田虜謀稍折初劔南度茂州之

西築安戎城以達其鄙俄爲生羌導虜取之以守因
并西洱河諸蠻盡臣羊同党項諸羌其地東與松茂
萬接南臨婆羅門西取四鎮北抵突厥幅圓餘萬里
漢魏時城所無也則天時遣韋待價問溫古討之兵
逗遛坐歿復遣岑長清往無功則天怒明年詔王孝
陸唐休璟阿史那忠節大發兵擊吐蕃破其衆復取
四鎮更置安西都護府於龜茲以兵鎮守未幾合突
厥兵南侵王孝傑敗走之明年攻臨洮又攻涼州殺
都督遣使者請和約罷四鎮兵求分十姓地武后詔
通泉尉郭元振往使道與欽陵遇元振曰東贊事朝

美誓好無窮今猥自絕歲擾邊父通之子絕之孝乎
父事之子叛之忠乎欽陵曰然然天子許和得罷二
國戍使十姓突厥四鎮各建君長俾其國自守若何
使使者固請元振固言不可許后從之欽陵專國久
常居中制事諸事皆領方面兵而贊婆專東境幾三
十年爲邊患兄弟皆才略沈雄衆憚之贊普器弩悉
弄旣長欲自得國漸不平乃與大臣論巖等圖去之
欽陵方提兵居外贊普託言獵卽勒兵執其親黨二
千餘人殺之發使者召欽陵贊婆欽陵不受命贊普
自討之未戰欽陵兵潰乃自殺左右殉而死者百餘

人贊婆遂率衆降唐封以王爵未幾贊普又諸子爭立國人立棄隸縮贊爲贊普始七歲其大臣數遣使求婚中宗不得已乃以雍王守禮女爲金城公主妻之遣楊矩持節送卽拜矩鄯州都督吐蕃外雖和而陰銜怒卽厚餉矩請河西九曲爲公主湯沐矩表與其地九曲者水甘草良宜畜牧近與唐接自是虜益張雄易入寇開元初其相坌達延將兵十萬寇臨洮入攻蘭渭掠監馬楊矩懼自殺玄宗遣薛納王駿等并力擊之斬首萬七千級虜大敗衆奔突不能去相枕藉洮水爲不流詔紫微舍人倪若水流按軍

戰功且弔祭戰亡士敕州縣并瘞吐蕃露齒贊普及
金城公主俱遣使上書請盟修好帝謂自己親有
成尋前盟可矣不許復誓禮其使而遣且厚賜贊普
自是歲朝貢不輒犯邊久之隴右節度使王君奭襲
擊吐蕃遂復啓靈攻甘州入陷瓜州毀其城執刺史
田元獻會君奭爲回紇所殺乃以蕭嵩爲河西節度克
平瓜州復城之時張守珪張志亮杜賓客等戰皆有
功多所斬獲贊普懼遣使請和皇甫惟明亦勸帝約
和從之敕惟明及中人張元方往聘以書賜公主惟
明見贊普言天子意贊普大喜因悉出貞觀以來書

詔示惟明厚饋遣使名悉臘隨使者入朝於是崔希
逸爲河西節度使鎮涼州故時疆畔皆樹壁守捉希
逸謂虜戍將乞力徐曰兩國約好而守備不廢云何
請皆罷以便人乞力徐曰公忠誠無不可恐朝廷未
皆信脫掩吾不備其可悔希逸固邀乃許卽共刑白
犬盟而後悉撤障壁虜畜牧被野明年僉史孫誨奏
事妄言虜無備可取也帝采之詔內監趙惠琮同往
按狀二人欲徵倖至涼州因共矯詔希逸發兵襲破
吐蕃青海上斬獲不貲乞力徐遁奔吐蕃恚不朝大
入河西希逸拒破之鄯州都督杜希望又拔新城更

號威戎軍項之節度兼瓊拔安戎城更號于我城而吐蕃攻維州不得志攻承風保藏希範破之襲廓州攻振武軍皇甫惟明哥舒翰等破之虜勢稍却明年贊普乞黎蘇龍臘贊殲于羊悉龍臘贊嗣遣使者修好詔京兆少尹崔光遠持節齎冊弔祠還時安祿山亂哥舒翰悉河隴兵東守潼關而諸將各以其所鎮兵討難嫪號行營邊候空虛故吐蕃得乘隙暴掠至德初取雋州及威武等諸城入屯石堡其明年取廓霸岷等州及河源莫門軍使數來請和帝雖審其譎姑務紓患乃詔宰相郭子儀蕭華裴遵慶等與盟寶

應初陷臨洮取秦成渭等州明年入大震關取蘭河
鄯洮等州於是隴右地盡亾進圍涇州入之降刺史
高暉又破邠州入奉天副元帥郭子儀禦之吐蕃以
吐谷渾党項兵二十萬東略武功渭北行營將呂日
將戰整屋西破之又戰終南日將交代宗幸陝虜入
長安衣冠皆南奔上至陝因望鐵牛蹶然曰朕幼時
宮中有尼言事頗驗屢撫吾背曰天下有災過牛方
迴今見牛朕可迴也是月光祿卿殷仲卿率千人壁
藍田選二百騎渡澧或詒虜曰郭令公軍且來吐蕃
大震曾少將王甫與惡少年伐鼓譟苑中虜驚夜引

去子儀入長安高暉東奔至潼關守將李日越殺之吐蕃留京師十五日乃送天子還京會僕固懷恩反自靈武遣其將范志誠任敷合吐蕃吐谷渾兵攻邠州白孝德郭希嬰壘守乃入居奉天郭晞攻之吐蕃引去圍涼州河西節度使楊志烈不能守跳保甘州而涼州亡是時兵馬使渾日進屯奉天吐蕃逼奉天日進以單騎馳之士二百踵進左右擊刺射皆應弦仆虜大驚辟易日進挾虜一將躍出舉軍望而譟士還無一矢著身者明日虜薄城日進發機石勁弩故兵多歿凡三日虜歛軍入壁日進知虜曲折卽夜斫

其營斬千餘級生擒五百又戰馬嵬凡七日破賊萬人斬首五千獲馬橐駝器械甚衆會懷恩死虜謀無主遂與回紇爭長回紇怒詣子儀請擊吐蕃自效子儀許之使白元光合兵攻吐蕃於靈臺西大破之降僕固名臣帝乃班師自是數寇靈邠涇隴黎雅諸州唐將馬璘白元光郭子儀輒攻破之吐蕃皆不得志而還及德宗卽位以歲與虜虜虜虜虜虜虜虜虜虜懷之遣太常少卿韋倫持節歸其俘五百厚給衣褚切敕邊吏護亭障無輒侵虜地吐蕃始聞不信使者入境乃皆敬畏是時乞力贊爲贊普尚結贊爲相卽

發使者隨倫入朝相與結盟境上云朱泚之亂渾瑊
用論莽羅兵破泚將韓旻於武亭中初與虜約得長
安以涇靈四州畀之會大疫虜輒引去及泚平責先
約求地天子薄其勞第賜詔書償結贊莽羅等帛萬
匹於是虜以爲怨貞元初詔趙建往使而虜已犯涇
隴邠寧掠人畜敗田稼復攻鹽夏刺史杜彥光拓拔
乾暉不能守悉其衆南奔虜遂有其地天子以邊人
殘沒下詔避正殿痛自咎詔駱元光經略鹽夏結贊
復來請盟唐使渾瑊及兵尚崔漢衡往虜計以伏兵
擒瑊瑊遁去漢衡等六十人皆被執虜戍鹽夏涉春

疫大興皆思歸乃火其廬舍頽邪堞而去結贊歸漢
衡等而却其使結贊乃以兵犯鳳翔入寶雞焚掠而
去又剽汧陽華亭掠男女牛羊率萬計涇隴邠之民
蕩然盡矣諸將會不能得一俘但負賊出塞而已自
是數寇涇邠寧慶鄜麟等州韋臯輒大破之西南少
安不三年盡得舊州地而虜特小小爲寇不絕是時
可黎可足贊普立幾三十年病不事委任大臣故不
能抗中國邊候晏然歿以弟達磨嗣達磨嗜酒好畋
獵喜內且凶愎少恩政益亂開成初遣使太子詹事
李景儒往使論集熟來朝獻玉器羊馬自是國中地

震烈水泉湧岷山崩洮水逆流三日鼠食稼人饑疫
死者相枕籍鄯廓間夜聞鼙鼓聲人相驚會昌中贊
普死無子以妃絢氏子乞離胡爲贊普其落門川討
擊使尚恐熱叛吐蕃部多歸之贊普不能制唐乘隙
遂得收復故地於是鳳翔節度使李泚復清水涇原
節度康李榮復原州取石門等六關靈武節度使李
欽取安樂州詔爲威州邠寧節度使張欽緒復蕭關
收秦州山南西道節度使鄭涯收扶州羣臣奏言王
者建功立業必有以光表於世者今不勤一卒血一
刃而河湟自歸請上天子尊號詔上順憲二廟諡號

夸顯後世明年沙州首領張義潮奉瓜沙伊甘肅等
十一州地圖以獻唐擢義潮沙州節度使河渭州虜
守將尚延心亦獻款擢河渭等州都游奕使未幾恐
熱爲僕固戰敗斬之傳首京師唐末中原多故甘州
并於回鶻歸義諸城沒於盟末而唐亦不能守也然
吐蕃亦自此衰弱族類分散無復統一矣自儀渭涇
原環慶及鎮戎秦州暨于靈夏皆有之各有首領內
屬者謂之熟戶餘謂之生戶涼州雖爲所隔然其地
自置牧守或請命於中朝五代時其首領朝獻不絕
宋時部落甚衆而中惟潘羅支李立遵唃廝囉最爲

雄傑勝兵六七萬潛羅支者西涼府六谷都首領也
咸平初知鎮龍軍李繼和言羅支願戮力討夏國李
繼遷請授以刺史從之羅支貢馬五千匹未幾繼遷
入西涼府知州丁惟清陷沒羅支率衆擊之繼遷大
敗中流矢歿詔封羅支武威郡王而以其弟廝鐸督
爲鹽州防禦使入貢不絕廝羅者贊普之後也而
宗哥部李立遵爲論逋佐之論逋猶華言相也二人
甚有威名諸部畏之祥符中入貢請討平夏以自效
宋以戎人多詐勿許也頃之夏主元昊強侵略廝羅
界地廝羅知衆寡不敵堅壁不出險間得元昊已渡

河挿幟志其淺乃潛使人移植深處以誤元昊及大戰元昊潰而歸士視幟渡溺歿十八九鹵獲甚衆自是數以奇計敵元昊遂不敢窺其境及元昊取西涼府羅支舊部多歸厮羅又得回紇種入數萬徙居鄯州地

今西寧衛漢金城郡破羌縣地

通青海高昌國蕃商皆趨鄯州

以故日益富強然亦受宋朝官爵治平初厮羅歿少子董氊立母曰喬氏而厮羅別有二妻皆李立遵女也生子曰瞎氊曰磨氊角立遵歿李氏寵衰斥爲尼錮其二子母族李巴全竊載其子奔宗哥磨氊角遂無有其衆瞎氊逃居龕谷亦據其地於是喃氏地分

爲三而董氊最強俱歲入貢宋皆授以刺史
董氊從宋討夏有功進封武威郡王後夏人欲與之
通好董氊拒之且整兵以待神宗聞而嘉焉元祐初
董氊卒子阿里骨嗣本于闐人少從其母給事董氊
養爲己子阿里骨歿子瞎征嗣頃之宋王瞻取邈川
青唐置湟鄯二州瞎征來歸國人遂共立隴拶爲主
隴拶者乃瞎氊之孫木征之子喃氏嫡支也夏人助
之攻破青唐據之宋遂并棄邈川而以隴拶爲河西
軍節度使封武威郡公世世襲職而加瞎征檢校太
傅懷遠軍節度使崇寧中王厚復湟鄯二州遂建熙

河一道郡縣而置之功雖訖成邊患不息後金人取
熙河復求喃氏子孫立之及元滅金盡并吐蕃之地
置爲郡縣而以吐蕃僧八思巴爲大寶法王帝師領
之相承不絕至我朝洪武六年令吐蕃諸酋舉故
官授職以攝帝師置都指揮使同知宣慰使元帥招
討等官以其地爲烏思藏等都指揮使司三朶甘等
宣慰司三朶甘思等招討司六沙兒可等萬戶府六
剌宗等十戶所十七自是蕃僧有封贊善闡教大乘
大寶王者俱賜印誥令比歲或間歲朝貢諸王嗣封
賜誥袞袞僧帽數珠鈴杵其在西寧黃河北者自四

川入在岷州黃河南者自陝西入凡陝西諸番畏宋將軍卽宋晟也洪永間久鎮西垂積功封西寧侯四川諸番敬信丁大夫乃丁玉也國初爲御史大夫出鎮四川最久威惠竝行夷民安輯而朝廷又設茶馬司數以茶馬互市羈縻之以故朝貢不絕西鄙稍寧天順間西番酋把沙作亂命總兵衛涇僉都吳璦等討之涇等率諸衛兵三萬餘人分五路以進追至駱駝山俘斬二千餘人獲畜產無算成化中西番滿松反侵內地馬文升討平之及正德時邊防大弛北虜小王子太師亦卜剌殺其主長子阿爾倫遜居西

海裔食諸蕃勢漸吞併識者慮其交通維勾猖獗如
前代先零吐蕃故事十年調朔方勁兵勦虜避交松
潘旋歸故巢費以萬計竟無成功至嘉靖初數乘虛
深入虜人畜焚廬舍殺掠大慘臨洮鞏昌騷動賴尚
書王瓊區處遣都督劉文游擊彭成等進兵且撫且
勦稍得安寧其俗地薄氣寒風俗朴畧然法令嚴整
上下一心議事自下起因人所利而行之故能持久
其國君贊普有城郭而不處聯毳帳以居號大拂廬
部人處小拂廬贊普與其臣歲一小盟三歲一大盟
其君臣自爲友者五十六人號曰共命君次皆自殺以

徇其吏治無文字刻木結繩爲約其刑雖小罪必抉
目刖鼻其樂吹螺擊鼓其四時以麥熟爲歲首其官
之章飾最上瑟瑟金次之金塗銀又次之銅最下差
大小綴臂前以辨貴賤養牛馬取乳酪供食取毛爲
褐衣率氊韋以赭塗面婦人辨髮而縈之俗重浮屠
政事必以桑門參決貴壯賤弱重兵歿以累世戰沒
者爲甲門敗懦者垂狐尾於首以示辱懷恩惠重財
貨交易用屬毯馬牛不知鑿藥疾病召巫覡焚柴聲
鼓謂之逐鬼信詛呪或以決事訟有疑使詛之喜啖
生物無蔬茹醯醬民獷而好鬪其譯語呼天爲難地

爲薩日爲你麻月爲老瓦其山川崑崙山

番名亦耳麻不刺山

一名大雪山雪經夏不消故名

可跋海

東南流至雪山南合西洱河號漾備水又東南出會川爲

瀘水

黃河析支湟水爲大物產甚多惟犛牛

有赤毛長腹肘下皆

尺尾大獐羊

重者數百斤其角甚大

草上飛

獸名形大如犬渾身似玳瑁斑貓樣

性神不惡若獅豹等猛獸等

骨篤犀

色如淡碧玉稍

兒之即伏於地乃獸之王也

金剛鑽

狀如紫石上如鍾乳底盤石上如鍾乳

如玉嗅之有香能消毒并

馬價珠

青色一枚價

以鐵錘之即碎可以切玉

天鼠皮

可爲

銅佛

鳥思藏者爲上

沙棠樹

實赤

食之使人不可爲舟

黑驢

日行千里善開

爲奇

論曰西戎爲患自三代已然矣蓋其散處河湟地近

關中故敢輒肆猖獗是體膚之患也然猶狗偷之謀也及先零當煎作虐而趙充國馬援徙之三輔內地如養虎自貽害者用是永初以後爲禍最烈是肘腋之患也然猶烏合之衆也迨姚秦氏興竊據中原偃然南面百官制度與中國同是腹心之患也然猶蝸角之勢也洎乎唐初號曰吐蕃幅員萬里上下一心殺戮吏民攻陷城邑甚且驅逐天子廢置官僚雖唐納幣結婚莫厭其欲盟血未乾而寇馬已臨矣自非郭子儀諸將威力唐之社稷不亦危乎五代以後內相殘賊各分部落宋元乘其衰弱收復故地稍得安

寧此何以故也蓋西蕃之勢譬之夾河水然分之則其勢微合之則浩蕩而不可遏我聖祖見及此也故登極未幾旋置烏思藏等司裂其地而封之簡其人而官之復置茶馬司互市而羈縻之以故二百年來西戎卽序自三代漢唐未之有矣顧今日所當防者不在吐蕃而在亦卜刺也蓋自亦卜刺之西竄也其跋扈者數矣第其勢弱而易制尤可無虞儻一旦部衆彊盛近結吐蕃遠結韃靼未必不爲疆場擾者昔哈密地空議者欲徙亦卜刺以實之斷其北虜西蕃之交此良策也今不可以他徙乎夫蔥菁之條久

而蔽日螻蟻之穴久而決堤防危於安圖著於微則
制蕃者當慮之矣

咸賓錄南夷志卷之六

明豫章羅曰聚尚之父著

安南

安南堯典所謂申命羲叔居南交是也秦并六國略定楊越置桂林南海象郡以適徙民與越雜處迨乎秦滅南海龍川令趙佗卽擊并桂林象郡自稱南越武王象郡卽今安南地也漢高立遣使陸賈封佗爲南越王使和輯百越毋爲邊害及呂后禁越關市鐵器於是佗乃自尊號南武帝發兵攻長沙邊敗數縣復以兵威財物賂遺閩越西甌落役屬焉東西萬餘

里乃乘黃屋左纛稱制與中國侔文帝卽位復遣陸賈往諭之南越王恐乃頓首謝去帝制黃屋左纛因爲書稱蠻夷大長老夫臣佗陸賈還報文帝大悅然其居國竊如故號至武帝初佗薨孫胡嗣王胡薨子嬰齊嗣王嬰齊薨子興嗣王初嬰齊入長安宿衛取邯鄲膠氏女卽興母也舊與霸陵人安國少季通及嬰齊薨漢使少季往諭王及太后來朝復與私通國人以是多不附太后太后恐亂起亦欲倚漢立威因使者上書請比內諸侯三年一朝除邊關武帝許之而其丞相呂嘉獨不欲內屬遂發兵反攻殺太后王

及漢使者終軍等而立嬰齊子建德爲王漢大怒遣
路博德楊僕等四道出兵擊擒之南越平遂以其地
爲儋耳珠崖南海蒼梧鬱林合浦交趾九真日南九
郡而儋耳珠崖二郡在海中焉武帝末中國貪其珍
賂漸相侵侮故率數歲一反至元帝時納貢捐之議
罷二郡諸郡雖屬中國而言語各異重譯乃通習俗
頗惡男女同川而浴後徙中國罪人使雜居其間乃
稍知言語漸見禮化光武中興錫光任交趾任延守
九真教民耕種嫁娶制爲冠履建立學校於是嶺南
有華風焉其徼外蠻夷亦數貢獻建武中交趾女子

徵側徵貳反甚雄勇九真合浦日南九郡諸蠻皆應之凡略六十五城自立爲王光武遣馬援破之斬徵側徵貳餘皆降散至建安初交趾刺史張津上表請改交趾爲交州詔從之遂拜津爲交州牧加以九錫彤弓彤矢禮樂征伐與中州方伯侔自錫始也桓靈以後蠻獠又據象郡象林縣遂爲林邑國矣魏晉宋齊爲州陳改爲郡隋廢郡置州煬帝復廢州置郡唐改交州總管府俄復改安南都護府自漢以來列置郡縣獠俗難理率數歲一反至五代時土豪曲承美據之已而并於劉隱劉隱者唐末爲封州刺史數有

功於嶺南朱梁封爲南海王隱卒弟龔立多勇略是時曲顥劉士政等分據嶺南諸州而龔出兵悉平之惟交州未克明年龔遂卽皇帝位國號漢好奢侈悉聚南海珍寶以爲玉堂珠殿久之遣將梁克貞等攻交州擒曲承美至南海龔曰公常以我爲僞廷今反面縛何也承美頓首伏罪乃赦之承美者曲顥子也無何愛州吳權攻交州自立龔封子洪操爲交王出兵攻之敗歿龔收其餘衆而還龔卒子玠立玠卒弟晟立十二年吳權子昌濬稱臣求節鉞晟遣使慰諭之晟卒子鋹立交州大亂驩州丁璉舉兵擊破之鋹

授璉交州刺史號曰大勝王宋太祖興諭使璉稱臣
不從遂擊平之璉素衣白馬以降封恩赦侯項之而
丁璉亦內附宋封爲交趾郡王自是後交趾代稱王
矣璉死弟璿嗣年尚幼而大將黎桓擅權劫遷璿於
別第舉族禁錮代總其衆太宗聞之怒遣將孫全興
等從水陸兩路討之稍失利桓志愈驕負阻山河屢
爲寇害漸失藩臣之禮矣宋帝志在撫寧不欲問罪
而桓亦時遣使入貢宋遂封爲交趾郡王桓死子龍
挺殺兄龍鉞而自立苛虐不法國人不附李公蘊遂
殺龍挺自稱留後遣使奉貢李公蘊者龍挺所親信

臣也宋以黎桓不義而得公蘊尤而效之甚可惡也然以蠻俗不足責遂封公蘊王號如故公蘊卒子德政立卒子曰尊立卒子乾德立會知封州劉彞聽偏校言以爲安南可取大治戈船交人來互市者率皆遇絕表疏上訴亦不得通於是大舉入寇連陷欽連邕三州屠其民五萬餘口神宗怒遣將郭達趙鼎等討之大破交兵乾德懼遂奉表乞再修職貢還所奪州縣尋約歸三州官吏千人久之方送民二百二十一口男子皆刺額年十五以上刺曰天子兵二十以上曰投南朝婦人刺左手曰官客悉載以舟而泥其

戶牖中設燈燭日行三十里則止而僞作更鼓以報
凡數月乃至蓋以紿示海道之遠也自是朝貢不絕
矣乾德卒凡五傳而昊昂立昊昂卒無子以女昭聖
主國事尋遂爲其壻陳日昷所有云自公蘊傳凡九
世而亾其名曰日曰乾曰陽曰天曰龍皆有僭上之
意而宋朝以其僻在海隅不復與較也元時遣將兀
良合台攻諸夷之未附者先遣使二人往諭交趾陳
日昷縛二使者以破竹束體入膚禁諸獄中元大怒
遣將徹徹都等分道進兵討之破其國而日昷奔海
濱弱不能支久之歸附元封其子光昺爲交趾郡王

光昺外子日恒立卒子日燁立自日暎後雖累世入朝而元責其貢物太重故多有時入寇掠者然終不能爲元敵也 我朝洪武元年遣漢陽知府易濟領詔安南其王陳日燹遣陪臣同時敘段梯黎世安等朝貢請封 上卽遣學士張以寧典簿牛諒往封日燹爲安南王以寧等十月至安南界聞日燹已先殂姪日燹嗣立以寧護詔印洱江上使牛諒入其國先諭旨安南遣陪臣阮汝亮來迎請卽授詔印日燹以寧不許曰奉詔封爾先君耳非世子名爾國當遣使上請必得旨然後敢授於是日燹遣陪臣杜舜卿等

告哀請命于朝以寧留安南候命因教安南人行三年喪及稽顙頓首拜謁諸禮儀其後上聞之大喜

賜以寧詩獎諭之明年舜卿以日燿計音來告且爲日燿請封上乃自製祭文以翰林院編修王濂吏

部主事林唐臣賁詔往封日燿嗣王并取以寧所護印詔賜物畀之使至日燿率其臣郊迎及俯伏聽詔北面跪受稽顙如藩臣禮日燿遣使隨王濂等還朝入貢謝張以寧亦還卒於途未幾安南陪臣陳叔明以兵收其王左右殺之使人弒王日燿遣使來貢表署叔明名主客部已受表尋取閱副封見其名異曰

此必有變亟白尚書詰之使者不敢諱直言日燬爲
叔明所逼而死遂篡位禮部以聞上曰島夷何敢
狡詐如此却其貢不受久之叔明復爲宗人陳煊篡
立遣使貢方物甚豐上置之不問第勅諭其貢物
過豐而已後煊攻占城病歿海濱使來告哀上遣
使往祭之是時日煊嗣王日煊者叔明之子也踰年
日煊爲其國相黎季犛所弑季犛改國曰大虞自稱
太上皇使其子胡查爲國王詐稱陳氏絕而查其甥
也求權署國事朝廷從之未幾老嫗宣慰使刁緣遣
使護送日煊孫添平來京懇其實季犛懼上表請添

平歸還以國詔遣廣西都督黃中呂毅前大理卿薛崑等護送添平還及入境李犛遣陪臣黃勝卿等迎候禮甚恭具牛酒犒師中等遣騎覘之壺漿屬路無他也遂進渡雞陵關山路險峻林莽蒙密軍行不得成列會天雨季犛乃伏兵山谷中衆數萬鼓譟出斷橋後騎不得前遂劫添平擒殺之崑亦死中等引還事聞 文皇怒四年以新城侯輔西平侯晟等二十五將軍率各省兵從廣西雲南兩道出討安南而以尚書劉儁黃福參贊軍務 上幸龍江誓師送之輔等至安南先傳檄數李犛罪二十諭其境內以立陳

氏後意然後帥兵進之是時安南恃宣洮富良諸江
爲固聞王師至遂緣北岸樹柵更築土城城柵相連
亘九百餘里江南岸列置椿內諸江口俱下桿木以
逆舟楫其土城高峻城外設重濠濠內密置竹簽外
坎地以陷人馬輔下令軍中曰彼所恃此城吾輩報
國立功在此一舉先登者賞不次於是將士踊躍期
夜襲城以舉火鳴角爲號四鼓都督黃中等銜枚昇
攻具越重濠薄城下以雲梯附城都指揮蔡福先登
諸將士繼之火舉角鳴安南兵倉皇矢石不得發皆
散走師悉入城復巷戰列象爲陣輔等以畫獅蒙馬

神銳翼而前象皆股慄多中銳箭傷遂退走交軍衆潰亂殺其帥梁民獻祭伯樂等追至傘圓山死者不可勝計頃之遂克東西二都凡宣江洮江等州縣皆降自是季犛將士氣沮輒戰輒敗前後斬首四萬餘級溺水者不可勝計大獲其戰艦兵仗諸郡邑相繼來降季犛遁去我軍遂窮追季犛父子於奇羅海口悉獲之詔求陳氏後已絕乃郡縣其地置交趾布按都使司府十七州四十七縣一百五十七勅尚書黃福兼布按二司事勅輔晟求交趾有行能學藝者送京師擢用九月輔遣柳升露布獻俘季犛蒼及僞將

相下獄餘皆赦之進封輔英國公晟黔國公封柳升
安遠伯餘各陞賞有差時永樂六年七月也八月交
人簡定鄧悉反晟討之失利七年勅輔討之擒簡定
磔於京踰年而陳李擴復叛自稱大越皇帝季擴者
卽簡定之從子也稱陳氏後以惑衆其勢重於定輔
復率衆往討轉戰連年始獲之自輔之下交南凡三
獲僞王威震西南夷中頃之召還而中貴人馬騏者
貪而殘苛失衆心黎利遂乘之反捕之不勝赦之不
服宣德元年遣王通柳升等帥兵由廣西雲南兩道
出討之升等師至交趾隘留關黎利及諸大小頭目

具書遣人詣軍門乞罷兵息民立陳氏後主其地升等受書不啓封遣人奏聞時利於官軍所經處悉列柵拒守官軍連破之直抵鎮夷關如入無人之境升勇而寡謀不嚴戒備前至倒馬坡獨與百數十騎先馳渡橋既渡而橋遽壞後隊阻不得進交人伏兵四起升中鏢歿從升者皆陷沒副總兵梁銘參贊尚書李慶郎中史安王事陳鏞李宗昉等皆歿惟主事潘原大脫歸適聞升歿懼不敢出乃與利約和利遂上書謝罪且乞封時宣宗厭兵意欲棄交趾未決乃集諸大臣議張輔等言不可而內閣士奇榮力勸棄

之遂然其言乃遣兵侍羅汝敬等赦利求陳氏後立之又勅通等班師內外鎮守三司衛所各府州縣文武吏士携家來歸通至京羣臣劾通及馬麒麟論死繫詔獄而利上表言陳氏已絕於是遣禮侍章敞通政徐琦冊利權署安南國事然利已竊改元帝其國中失利卒凡六傳而瑯立鄭惟鏞與陳真等共殺之而立僞沱陽王諲是時僞武川伯莫登庸興兵柄久之逐諲而自立國號大越無何傳位於其子方瀛而登庸自稱太上皇諲恐遇害避居清華府登庸復出兵攻之諲走老撾國以嘉靖九年九月憤悒死而諲故

臣共立其子寧居於清化府之木州漆馬江與老撾
隔界登庸屢遣兵攻之而老撾時爲援不能克無何
寧來請兵乃下兵部議以咸寧侯仇鸞尚書毛伯溫
等往討之會兩廣撫守臣厭兵而莫氏先已上表言
黎譔無子垂歿時與羣臣議登庸父子有功於國召
登庸子方瀛入付以印章令嗣主國事黎寧乃亂臣
阮淦之子冒稱黎姓者也其所自列如此然大抵皆
誣罔辭也伯溫等至交趾與諸將經畫既定兵衆漸
集馳檄諭其臣以 朝廷興滅繼絕之義討罪止於
登庸父子有能舉郡縣降者卽以郡縣授之擒斬莫

登庸父子來降者賞二萬金官顯秩又諭令莫登庸父子果能束身歸罪盡籍土地人民納款聽命亦待以不死於是伯溫等駐師安南境登庸懼遣使詣軍門乞降躬聽處分詞頗卑切伯溫等承制許之約以十九年十一月初三日來降守臣於鎮南關近地修設幕府將臺以待時登庸子方瀛已死乃留孫福海於其國至日登庸與侄莫文明并酋目阮如桂等四十餘人入關各尺組繫頸詣所設闕庭徒跣匍伏稽首跪上降表復詣軍門匍伏再拜盡籍國中土地軍民職官悉皆處分所侵四峒境土願以內屬仍請每

領正朔遵奉舊賜印章謹護守以候更定於是伯溫等宣諭 朝廷威德暫令歸國候命伯溫等疏上詔從之乃降安南國爲安南都統使司以登庸爲都統使從二品子孫世襲別給銀印舊所僭擬制度削去令三歲一貢黎寧仍令守臣勘訪果係黎氏之後授與所據四府境土以承宗祀否則已制下莫登庸已歿伯溫等復上疏請以制命授其孫福海從之遂班師伯溫等進秩賞賚有差未幾福海復爲黎寧所逐黎氏仍據國莫氏竄居南海島朝廷置不問而黎氏朝貢至今不絕其俗夷獠雜居粗知禮義獷悍喜

關重富輕貧一年三稻一歲八蚕地多魚鹽之利惟

交愛人個儻好謀謹演人淳秀好學其譯呼天爲雷

地爲得日爲靄月爲盪其山川佛蹟山景物清麗爲一方勝槩

安鑊山出美石漢豫章太守范甯嘗遣吏於此採石爲磬艾山有仙艾春開

花漂落至水魚吞之龍門江其傍有穴出鸚鵡魚色

爲龍溪昔陳氏夜過江不能渡忽得一橋富良江其

產有蘇合油其樹生膏爲油或雞舌香可以口含不

隨水出香乃藥花而成者都梁香似藿浮沉藤間子

藤實皆赤人子藤其子如人狀燒之千歲子有藤葉

子在菴羅果中極品石栗生山石罅中花開三九層

皮

脫至九層方見肉熟而食之其味類栗

訶羅勒

皮肉相著交

楓樹子

大

如雞子

古度樹

一名枕不花而實實從木皮中出

燒

之甚香

木綿樹

實如酒杯皮薄中有如絲綿

化

為紋

者色正白

破一實得四五斤

穰木樹

長三四丈圍三

米

可作餅食

莎樹

亦可食

由梧竹

人可作梁柱

如何

九百年一實形如栗長五尺

赤絮

漆也有土赤如膠以木技

青

蟻子鹽醢

溪洞人收蟻卵鹽為醬甚珍貴之

象牙簾

織成者

猩

人能言嗜酒

白鹿白雉

俱純白色

狒狒

長臂黑身披大蜈

蛇

反可斃鼓肉白如

紅飛鼠

蕉毛肉翼每雌雄伏花

去

南中婦人採之

辟寒犀

色黃如金以金盤置於殿

此

物

辟珠

大者如指辟銅鐵者銅鐵不能損辟竹本

椰子樹碑諸果
上謂之聖鎮

爲奇

論曰安南東至海西抵老撾南接占城北連思明殆
雄視南方之國也自漢武滅平南越之後列爲郡縣
叛服無常中國未嘗一世忘兵革矣後乘五代之弱
乃自稱王宋卒不能收復故境遂益恣睢偃然自據
及聞我聖祖龍興貢使相尋稱臣請封始未嘗不
效順而後稍驕桀殺我使臣也文皇勦平而郡縣
之豈非王法宜爾哉蓋炎荒萬里之遠縱之則虎踞
其外守之則蠹耗其內余固謂文皇之討天威也
宣宗之棄遠慮也二帝之識同一揆矣厥後王師甫

至莫登庸係頸徒跣匍伏納款貽謀之審此足徵焉

占城

占城古越蒙氏漢象林後爲林邑國唐環王國宋名
占城元與國朝因之周成王時越蒙氏重九譯而獻
白雉以後罕通及漢定南越之後爲象林縣屬交趾
者數百年漢末大亂縣功曹子有區連者殺縣令自
稱林邑王子孫相承吳時通使其後王無嗣外孫范
雄代立雄歿子逸嗣逸歿奴文篡立文者日南夷帥
范幼家奴也嘗牧牛於山澗得鱧魚二化爲鐵因以
鑄刀刀成文向石呪曰若斫石破者當王此國因斫

石如斷藟藁文私心異之范幼嘗使之商賈至林邑
因教林邑王作宮室及兵車器械王寵任之後乃讒
言諸子各奔他國及王死無嗣文僞於鄰國迂王子
置毒於漿中殺之遂脅國人自立後稍攻破旁國并
有衆四五萬又陷日南襲九真勢遂滋大文死子佛
立晉日南太守灌遂帥兵討之追至林邑佛請降自
佛五傳而至文敵爲扶南王子當根純所殺大臣諸
農平其亂自立爲王諸農死子陽邁立陽邁初在孕
其母夢生兒有人以金席藉之其色光麗夷人謂金
之精者爲陽邁若中國云紫磨者因以爲名宋初遣

使貢獻以陽邁爲林邑王陽邁歿子咄立每獻使貢
獻獻亦陋薄而寇盜不已文帝忿其違傲遣檀和之
宗慤蕭景憲伐之景憲爲先鋒攻城尅之乘勝卽克
林邑咄父子竝挺身逃奔獲其珍異皆是未名之寶
又銷其金人得黃金數十萬斤其後歷宋齊梁陳朝
貢不絕矣隋文帝旣平陳天下無事羣臣言林邑多
奇寶者於是隋帝遣將劉方等擊之其王梵志率其
徒乘巨象而戰方軍不利乃多掘小坑草覆其上因
以兵挑之方與戰僞北梵志逐之其象陷軍遂亂方
大破之遂棄城走入其郡獲其廟主十八枚皆鑄金

爲之蓋其有國十八葉矣方班師故地遂空梵志收
合遺人別建國邑更名環王唐貞觀初王頭黎獻馴
象鏐鎖五色帶朝霞大火珠其言不恭赦不問又獻
五色鸚鵡詔還之頭黎歿子鎮龍立獻通天犀後鎮
龍爲其臣下所殺大臣共立頭黎女爲王諸葛地頭
黎之姑子也父得罪奔真臘女王不能定國大臣復
共迎諸葛地爲王妻以女天寶中獻火環大如鷄子
狀如水晶日正午時以艾藉珠輒火出云得之羅刹
國自後罕通周顯德中占城遣使來獻有通犀帶菩
薩石又有薔薇水麗水經歲香不散猛火油得水愈

熾國人用以水戰宋時四百餘年朝貢不絕貢物有
琉璃犀角象牙孔雀龍腦香大食瓶馴象獅子紅白
鸚鵡紫礦沉檀諸香等物地與交鄰數爲交趾所侵
故入貢時輒以討交趾爲請宋以交趾通不絕勿許
也淳熙間占城以舟師襲破真臘慶元以來真臘大
舉入占城復仇俘其王戮其臣僕勦殺幾無噍類更
以真臘人爲王元至元中遣右丞唆都往諭占城王
明年其王遣表貢方物稱臣內屬元命唆都卽其地
立省以撫安之既而王太子補的專國元使往還國
及馬八兒國經占城者皆被執於是占城行省遣將

陳仲達劉金等率兵四面攻之占城大敗國王亭由
補刺者五棄行宮燒倉廩與其臣逃入大州西北鴉
候山元兵攻大州王遣其舅寶脫禿花等詣行省來
降獻雜布二百匹大銀三錠小銀五十七錠碎銀一
甕來歸款又獻金葉九節標槍言國王中創病太子
補的被傷已死俟王病少愈詣闕進見也行省尋遣
人覘之語皆僞情王實聚兵三萬餘於鴉候山遣使
交趾真臘閩婆等國借兵期與元兵交戰於是行省
遣萬戶張顥等往攻王所棲之境其地山林阻隘不
能進占城人旁出截歸路軍皆死戰得解還營頃之

江淮省遣萬戶忽都虎等至占城助唆都軍見已班
師遂令百戶陳奎招其國王來降王遂奉表歸款元
自是不復加兵矣我朝洪武二年遣吳用顏宗魯
楊載等使占城爪哇日本等國賜玉璽書是年遣使
朝貢我遣使封阿答阿者爲占城國王未幾上聞
安南占城相攻占城遣使來告乃命編修羅復仁主
事張福以詔諭之令宜畏天守分各罷兵歸國如互
執兵端禍不能逃詔至二國各聽命四年占城復遣
使奉金葉朝貢言安南數侵境乞賜兵器樂人俾安
南知我乃嚴教所被輸貢之地不敢欺凌上憐之

命中書省咨言卽諭安南罷兵兵器不爾吝但以安
南故賜爾是助爾構兵也樂器有聲律華夷方言本
異中國人不可遣遣爾國人能習華音者來習樂十
六年遣子賀 聖節賜勘合文冊二十四年使至以
臣弒君故絕之永樂四年勅王占巴的賴得黎賊父
子及其黨惡卽械送京尚書陳洽在南交軍中馳奏
占城國王占巴的賴奉命出兵討安南陰懷二心愆
期不進及進至化州輒肆虜掠又以金帛戰象資李
擴李擴亦以黎蒼女遺之復約李擴舅陳翁挺等三
萬餘人侵升華府隸四州十一縣地驅掠人民罪下

季擴一等耳請發兵討之上以交趾初平不欲窮

兵遠夷遣使諭王歸我侵地命三年一貢正統六年
國人請封其嗣王成化中遣使冊封正使卒海上副
使論罪戍邊弘治中復遣使告安南侵據狀乞命官
往正其罪上欲從之徐溥等上言春秋王者不治
夷狄今若遣使往至安南彼小必掩過飾非大必執
迷抗命置之損威擊之貽患尤大宜勿聽乃止其國
南距真臘西距交趾東北際海自閩長樂五虎門西
南行順風可十日至其地自廣州發舟順風八日可
至俗獷悍果於戰鬪商船至卽差官監盤十取其二

外聽交易尚釋教王冠三山金花玲瓏冠衣白跣足
乘象或黃牯車每視朝有美女三十人侍從官屬皆
膜拜臣焚葉冠男蓬頭女後椎結所居茅茨不得踰
三尺民衣紫衣衣玄黃罪戾出入乘象馬粒食亦鮮
食殺牛祭鬼驅象逐邪市用金銀焚衣祭天地性好
潔日三五浴以腦麝塗體以諸香熏衣地不產茶惟
以檳榔止渴釀酒甕中俟熟賓主繞甕坐筒而啞且
啞且注水味盡而止文書用羊皮及黑木皮無閏月
晝夜各分五十刻其刑罪輕者以四人拽伏於地藤
杖鞭之罪當死者以繩係於樹用校槍齊喉而殊其

首若故殺劫殺令象踏之或以鼻捲撲於地犯姦者男女各入一牛以贖罪負國王物者以繩拘於荒塘物充而後出之王當賀日沐人膽汁將領獻人膽爲賀第不用中國人膽傳云往年有用華人一膽者是日一甕之膽盡皆朽腐王卽病歿故戒之王在位三十年卽入山茹素受戒令子侄攝國居一歲籲天誓曰我不道當充虎狼食或病歿期年無恙復入爲王若民入山爲虎所噬或舟行被鰐魚之厄其家訴於王王命國師作法誦呪書符投名歿所虎魚卽自投赴請命殺之若訟曲直難辨者令過鰐魚潭曲者魚

出食之直者雖過其前鰐魚自避

此與梁書所載扶南事同

國中

人非日午不起非夜半不眠有婦人號屍致魚者目無瞳夜飛頭入人家食小兒穢氣頭返合體如故失其體不得合則死矣昔漢武時因墀國使者云南方有解形之民能使頭飛南海左右手飛東西海至莫頭還肩上兩手遇疾風飄於海外卽此是也其譯語呼天爲刺儀地爲打納日爲仰胡銳月爲仰不藍其山川金山

山石皆赤其中產金夜則出飛狀如螢火

不勞山

犯罪則送此山今自亥

爲大其產大火珠

與唐時所獻火環同

菩薩石薺薇水猛火油

見前

奇南香

惟產此國

生金

卽金山所產者

吉貝

樹名也其華成時如鶯毳抽其緒紡

爲布亦野牛

性甚狠見人身穿青者必逐抵觸而奔

海棗

樹如栢實大如瓜五年

一實味甚甘

觀音竹

如藤長二丈節長二寸色黑如鐵

千步草

千步南海

皆有

婦人魚

狀如婦人形髮皆具出

海鏡

如蚌中有

如海鏡饑則蟹出拾食蟹飽歸腹則海鏡亦飽也

寶母

狀如美石每月望夜以置海邊可集諸寶

世不見澄水珠

投濁水中則其水瑩然澄澈可愛

爲奇

論曰林邑占城故越裳氏諸史載之第考越裳氏之

事則有大謬不然者蓋當周成王時越裳貢雉使者

曰吾受命國之黃耆天無烈風淫雨海不揚波三年

矣意者中國有聖人乎故越萬里來獻周公歸之王

薦於宗廟久之使者欲歸迷路公錫以駢車五乘皆

爲指南之制使者載之由扶南林邑海際蒼年而至
國焉今占城之地路從閩廣順颺不踰旬日可至奚
待期年且又云由林邑海際而行何也在秦漢旣名
林邑乃後漢及王莽時有書越裳貢白雉者此又曷
以稱焉余本志中但列越裳之名而略其事蓋疑之
也第以勢力孱弱之國地鄰安南輒受侵辱故入貢
時輒以討安南爲請夫夷狄相攻中國之利也帝王
馭夷如馴鳥然寧饑勿飽飽則搏風而逝矣儻助之
兵而令占城得志安能必其後之向化如今日哉

聖祖知之故 詔諭安南罷兵勿從其請一以外杜

八風寶錄卷之六
夷奸一以內恬民事其神謨遠略代罕儔焉彼區區
越裳之獻又未足爲今日重也

真臘

真臘本扶南屬國漢成帝時獻萬年蛤夜光珠帝以
蛤賜趙后以珠賜婕妤後久未通至隋復通中國唐
初其王質多斯那并扶南其勢遂盛扶南者其先有
女人爲王號曰柳葉年少壯健裸體披髮不制衣裳
其南有徼國事鬼神者字混填夢神賜之弓乘賈人
船入海混填晨起卽詣廟於神樹下得弓便依夢乘
船入海至扶南外邑柳葉人衆見船至欲取之混填

卽張弓射其船穿度一面矢及侍者柳葉大懼舉衆
降混填混填乃教柳葉穿布貫頭形不復露遂治其
國納柳葉爲妻生子分王七邑其後王混盤況以詐
力間諸邑令相疑阻因舉兵攻并之乃遣子孫衆分
治諸邑號曰小王盤況年九十餘歿立中子盤盤以
國事委其大將范蔓盤盤立三年歿國人共舉蔓爲
王蔓勇健有權略復以兵威攻伐旁國咸服屬之自
號扶南大王乃治作大船窮漲海攻滅旁十餘國開
地五六千里後爲其弟子旃篡立蔓歿時有乳下兒
名長在民間至年二十乃結國中壯士襲殺旃旃大

將范尋又殺長而自立吳時遣中郎康泰宣化從事
朱應出使其國國人猶裸唯婦人著貫頭泰應謂曰
國中實佳但人褻露可怪耳尋始令國內男子著橫
幅大家截錦爲之貧者用布晉武帝穆帝時俱遣使
來貢其後王儵陳如本天竺婆羅門也有神語曰應
王扶南儵陳如心悅南至盤盤扶南久聞之舉國欣
戴迎而立焉復改制度用天竺法儵陳如歿其後王
梁書具載有世次名號歷宋齊梁朝貢不絕梁大同
初遣使獻生犀又言其國有佛髮長一丈二尺詔遣
沙門釋雲寶隨使往迎之其髮青紺色以手伸之隨

手長短放之則旋屈爲螽形案僧伽經云佛髮青而細猶如藕莖絲佛三昧經云我昔在宮沐頭以尺量髮長一丈二尺放已右旋還成螽文則是眞爲佛髮也頃之其國有人持一碧玻璃鏡來貿易者鏡廣一尺五寸重四十斤內外皎潔置五色物於其上向明視之不見其質問其價約錢百萬貫舉國不識莫有酬其價者以示杰公杰公曰是上界之寶也當爲國王及大臣所藏爾胡客何由得之必竊盜至此者胡人逡巡不能對俄而其國遣使追訪果如所言隋時其王姓古龍遣使貢獻唐貞觀中貢白頭國二人素

首白身如凝脂然未幾眞臘滅之據有其地扶南遂
以眞臘自武德至聖曆間凡四來朝至神龍中分爲
水陸眞臘二國大曆中其副王婆彌及妻來朝獻馴
象十一擢婆彌試殿中監賜名賓漢是時德宗初卽
位珍禽奇獸悉縱之蠻夷所獻馴象畜苑中元會充
庭者凡三十二悉放荆山之陽元和中水眞臘亦遣
使貢獻言屬國有道明國無衣服見衣服者共笑之
蓋幾與禽獸爲羣矣宋政和至紹興間朝貢不絕朝
廷封其王與占城等焉淳熙間占城襲破其國眞臘
人養精蓄銳十有餘年大舉入占城更立眞臘人爲

王於是占城遂爲眞臘屬國矣我朝洪武六年國王忽兒那遣使表獻方物賜大統曆文綺自是朝貢不絕昔元時周達觀出使其國著有眞臘風土記載其事甚詳其最異者言國王每夜臥一金塔上有九頭蛇精係女身來與國王同寢交構二鼓方出可與妻妾同睡若此精一夜不見則王必期至矣若王一夜不往亦必獲災禍亦有儒釋道三種呼儒爲班詰於頂上以白線挂之別其爲儒也呼道爲人思其國中道教少亦不甚尊呼僧爲苧姑其教最盛王公庶人皆敬畏之如神明然民家養女至八九歲必命僧

去其童身名曰陣毯蓋官司於中國四月內頒命陣
毯之家先行申報然後行其事秘不令唐人見之陣
毯後必用金銀布帛等物與僧贖身否則此女終爲
僧有矣前此父母必與女同寢以後斥於房外任其
所之刑無絞斬重罪則坑之次則斷手足耳鼻次則
罰金而已其土地靈人多術法如辨盜真僞置其手
油鍋中真爲盜者手卽腐爛否則皮肉如故又辨訟
曲直令兩家各坐一小石塔三四日其理曲者必獲
證候或身生各病理直者略無纖事謂之天獄婦多
淫國多兩形人每日十數成羣行於墟場間常有招

來唐人之意反有厚饒人歲賦擲野曠中俟有鷹犬
類來食頃刻而盡則謂父母有福否則謂之惡報今
亦漸有焚者男女椎髻以去髮爲厭制國王仍用塔
葬交易皆婦人唐商人到彼必先納一婦爲便其見
唐人亦頗加敬畏呼之曰佛云余觀通典通考各代
史異域志諸書所載俱未有如此之異者但言其國
地無霜雪自四月至九月日夕皆雨水高十丈巨樹
盡沒民移入山居至十月絕無雨水民復還耕種王
三日一聽朝坐五香七寶牀上施寶帳以文木爲竿
象牙金鈿爲壁其冠履服制大都盡華飾也民俗亦

侈靡以錦圍身故諺云富貴真臘官名與占城同輒
與參半朱江二國和親數與林邑陀栢二國戰爭其
人行止皆持甲杖王初立日甚至戚兄弟並刑殘之
令別處供給不得仕進法無牢獄有罪者先齋戒三
日乃燒斧極赤令之捧行七步蕃殺漢人卽償其灰
漢殺蕃人罰金而已人或以五香木燒尸收灰以金
銀盆盛之貯之水中貧者或用瓦亦有不焚送屍山
中任野獸食者其鄰有西棚國天隅有一竅極明土
人稱爲天門云女媧氏之所不至也其譯語父爲巴
馳母爲米姑兄爲邦弟爲補溫其山川則陵伽鉢羅

山

土有神祠神名安多利祭用人肉每以

其產嘉果

建同

魚也鼻如象汲水止

浮胡

魚也嘴如鵝入足

大魚

望之如山

每五六月中毒氣流行即以白

威母

似猿打死得氣即活惟以芭蒲

塞其鼻則死不然其歲荒災

却塵獸

其皮不沾塵故名元載寵姬薛瑤英曾以為褥高麗

亦有金顏香

香乃樹脂有黃白黑三色白者毗野

實似

娑田羅

實似

歌畢佗

實似

鰐魚

大者如船四足類龍特無角耳肚甚

脆美人酒

美人口中含而造之一宿而成

為奇

論曰真臘自古通貢俗同諸夷而周達觀所紀獨異

羣書至辨盜辨訟事西南諸國多有此俗非特真臘

然此何故也蓋地邇印度奉佛甚謹善惡報驗佛法

固然嘗讀內典見有阿闍王令醉象蹋佛佛以慈善
根力舒五指成五獅子以佈醉象事又有西土龍樹
與善呪婆羅門角力婆羅門化大池蓮坐其上龍樹
化白象入池鼻舉蓮花高擲婆羅門事此惡驗也又
有毗奢利國有人如馬裸露見王號呼王運神力分
身爲蚤頃乃得衣事又有波斯匿王收五百賊剗其
兩目棄入坑中爾時羣賊苦痛念南無佛達摩以慈
善根力吹藥令人賊目悉平事此善應也諸如此類
不可勝述余恐士人以真臘事爲誣故偶敘之末云

瓜哇

爪哇漢晉以前未聞唐爲訶陵宋爲闍婆元爲爪哇
國朝因之唐貞觀中訶陵王遣使者貢金花等物至
上元間國人推女子爲王號悉莫威令整肅道不舉
遺大食君聞之齎金一囊置其郊行者輒避如是三
年太子過以足躡金悉莫怒將斬之羣臣因請悉莫
曰而罪實本於足可斷趾羣臣復爲請乃斬指以徇
大食聞而畏之不敢加兵大曆中訶陵使者三至元
和中獻五色鸚鵡頻伽鳥咸通中獻女樂又獻金花
帳溫涼牀龍鱗席鳳毛褥玉髓香瓊膏乳宣宗陳之
以迎佛骨自後罕通宋元嘉中奉表入貢淳化初國

王穆茶羅遣使貢方物甚夥使者言其國與三佛齊有仇怨互相攻戰山多猴不畏人呼以霄霄之殼卽出或投以果實則有大猴二先至土人謂之猴王猴夫人食畢羣猴食其餘其鄰國名婆羅門有法善察人情人欲相危害者皆先知之詔賜金幣甚厚賜良馬戎具以從其請大觀後朝貢不絕尋以南郊事授中國官職封爲闍婆國王食邑二千餘戶自是宋每遇大禮加闍婆王官邑以爲常矣元至元中詔史弼高興等征爪哇水陸竝進軍會船中無水海水鹹不可食士饑渴欲死史高拜天祝之尋以鎗挿海灘中

清泉涌出因名聖水士卒得天賜遂大奮擊殺傷甚衆尋撫諭降之至我朝其國分東西二王洪武時凡兩遣使來貢已而我使至三佛齊爪哇要而殺之置不問至永樂三年東王寧人之達哈遣使請印與之五年西王都馬板滅東王時我使過東王城西王殺我百七十人後懼遣使謝罪勅令償死者黃金六萬兩而爪哇遣使貢萬兩上蠲其金曰朕利金耶令遠人知畏爾十六年獻白鸚鵡令三年一貢其國天無霜雪四時常熱王居不甚麗民皆茅茨其國有四處王無常居往來四處之間一曰杜板民千餘家二

人爲長聖水在焉一日新村原係沙灘之地因中國人來此居遂成村落民甚殷富各國番船到此貨賣一曰滿者伯夷民二三百家頭目七八人以輔其王曰蘇魯馬益民千餘家亦有村王有大洲聚猴數萬惟一老雄猴爲王一老番婦人侍立其傍俗婦人求嗣者備酒肉餅果等物禱於老猴老猴喜則先食其物衆猴隨分食之尋有雌雄二猴前來交感爲驗此婦歸家便卽有孕否則無孕且又能作禍故人家家多備食物祭之傳言唐時其家人有五百口男婦兇惡忽一日有僧至其家取水喫之五百人俱化爲猴惟

一老嫗未化今舊宅猶存此亦大奇事也其四處人亦有西番胡人唐人土人三種胡人久居服食雅潔唐人持齋受戒土人有名無姓豚頭赤脚無椅榻匙筯啖食蛇蟻虫蚓與犬豕同寢食不爲穢也男必佩刀刀極精巧不設刑禁輕者許以物贖重者滕繫殺之其民不爲盜道不拾遺諺云太平閭婆是也書同瑣里無紙筆惟以尖刀刻於菱葦葉上亦有字法市用中國古錢病不服藥但禱神求佛其人死屍不朽喪有水葬火葬犬葬惟死者所欲女人有毒中國人與之交接則苦瘡或致死若涎液露著草木卽枯其

國俗四季每月望夜前後番婦數十人聚衆成隊一婦爲首衆婦隨行月下首婦唱則衆婦皆和至親友富貴家則贈以鈔帛等物每十月有竹槍會其國王及妃各乘一車至會所令男子二人爲偶各執竹槍妻各執短木列其旁及交敵三合妻各以短木隔之曰那刺那刺則退設中槍灰王令勝者與灰者金錢一個灰者妻卽隨勝者而去舊傳鬼子魔於此地與一罔象相合生子百餘啖人血肉人被啖盡一日雷震石裂中坐一人衆異之奉爲國王卽領兵驅逐罔象而不爲害相傳至今其國之移文後書一千三百

七十六年考之乃肇啓漢初時也旁有蘇吉丹國裸體跣足俗甚醜惡其東則女人國

見朝鮮志

愈東則尾間

之所洩非人世矣亦有飛頭食人者衆共祠之名曰

虫落因號落民地凡自泉州發舟一月可至其山川

鸚鵡山

出鸚鵡

八節澗

元史高興會兵于此

其產有綵鳩綠鳩

紅白鸚鵡倒挂白鹿白猿白猴

俱純白色唐宣宗時南海蠻獻白猿脂數

甕

椰板

如批杷肉二塊味佳

蚕吉柿

如石

蝦蟇丹

樹也其

又有梳椰

鹽

從山穴中涌出國人食之爲奇

論曰昔郅支樓蘭漢諸夷中大國也邀殺漢使陳湯

傅介子猶擊斬之今瓜哇叢爾小蠻橫行猖獗其罪

過於郅支樓蘭遠矣倘興師伐罪勢如破竹第帝王
一怒必伏尸流血故聖祖重行之詔罰以金尋又却
之曰今遠人知畏爾君子謂是舉也德莫厚焉威莫
加焉俾四夷聞之爭向化矣

三佛齊

三佛齊卽舊港國又名淳林東南海中大國也唐天
祐初遣使貢方物宋自建隆以至淳熙朝貢不絕貢
物則有水晶火油象牙乳香薔薇水萬年棗偏桃白
沙糖水水晶指環琉璃瓶珊瑚樹崑崙奴崑崙奴者能
踏曲爲樂者也我朝洪武時國王怛麻沙那凡三

遣使朝貢賜大統曆文幣項之其後我招諭拂菻
時其王怛麻沙那次賜王子麻那者巫里三佛齊國
王印有廣東人陳祖義者脫罪避居其國久之得爲
將領暴掠番商永樂中太監鄭和至三佛齊祖義鄉
人名施進者訴於和和擒祖義獻俘闕下以進代之
進沒女二姐嗣其地自廣州發舟正南行半月可至
自泉州行月餘可至番舶輻湊多廣東漳泉人土沃
宜稼穡諺云一季種谷三季生金言米谷盛而爲金
也習水戰服藥刀不能傷遇敵敢死鄰國畏之水多
土少惟將領陸居民率架筏水中架梁柱不輸租賦

有事隨時調發語言如瓜哇市用錢布并燒煉五色珠字用梵書以其王指環爲印王出入乘船身纏花布衛以金鏢俗稱其王爲龍精不火食食則大荒不水浴浴則大潦惟食沙糊浴薔薇露而已前後國王各先用金鑄其形質代代勿毀舊傳其國地面忽然穴出生牛數萬人取食之後用竹木室其穴乃絕其產物亦多有火雞頂有軟紅冠如紅絹二片渾身如羊毛青色其爪甚利傷人致灰好食火炭故名用提針擊不同神鹿高三尺大如巨豕鶴頂海鶴頂也能灰與滿刺加出者不同爲帶血結治傷妙藥薔薇水金銀香色白如銀膺肭臍形如飛走如飛取其腎以清爲奇

油名膺肭臍爲奇

論曰海濱諸國兩粵以命多遁歸之大都能導夷人作逆如日本事可概見也第三佛齊勢孱弱爾陳祖義施進俱係叛賊謂宜先誅祖義旋及施進卽不然檻進抵京以杜後來可也曷爲官之同罪異罰鄭和失之矣

暹羅

暹羅本暹與羅斛二國暹國漢赤肩之遺種也土瘠不宜耕種羅斛土腴衍多獲暹人歲仰給焉自古不通中國元至正間暹人降於羅斛合爲一國進金字表欲元遣使至其國比至元已先遣使彼蓋未之知

也賜來使素金符佩之使急追詔使同往大德初暹
國王上言其父在位時朝廷嘗賜鞍轡白馬金縷衣
乞循舊例以賜元賜以金縷衣不賜以馬我朝洪
武初遣大理聞良輔往諭之國王叅烈昭昆牙遣使
朝貢併獻其國地圖上遣人賜以印誥永樂初乞量
衡爲國中式詔給之頃之其國使與琉球修好爲
風漂舟至福建省布政司籍記船物請命上曰番
邦修好美事也豈可利其物而籍之其令布政司舟
壞者修理乏食者給粟俟有便風仍導之去使歸暹
人戴之自是朝貢不絕而我亦輒遣使封其嗣王成

化間其貢使有美亞者乃本朝汀州士人謝文彬也
昔因販鹽下海爲風飄入暹羅遂仕其國嘗至南京
爲其從子贊偶遇識之爲織殊色錦綺貿易番貨事
覺下吏始吐實焉嘉靖中國王遣使貢白象及方物
白象已斃遺象牙一枝長八尺牙首鑲金石榴子十
顆中鑲珍珠十顆寶石四顆尾置金剛錐一根又金
盒內貯白象尾爲證隆慶時爲東牛國所攻欽賜印
信被兵焚無存奏請另給禮部議往彼國取印篆字
樣并精通番字人員赴京教習後使來遂賜冠服畱
教習其國由廣東香山縣登舟順風計約四十日可

至遇東風飄舟西行卽舟壞猶可登山東有山名萬里石塘者起自琉球國潮至則沒潮退方見若東風飄舟至此十無一存者故彼來貢必五六月南風此去則用十一二月北風過此則不敢行矣王宮殿壯麗民樓居上聯檣榔片或陶瓦覆之坐臥卽於樓上簾以氈及藤席無牀几之制惟王以受封天朝故畱髮臣及庶民俱剪髮婦人畱髮粧髻於後無姓有名爲官者稱僱某爲民上者稱柰某最下稱隘某葬有烏葬火葬水葬王灰水銀灌腹以帛纏之同片腦納棺中停置一年仍用火化拾骨葬于塔下貴人亦然

小罪枷桎遊市中大罪殺之河邊浮尸水上好誦佛經字皆橫書橫誦俗頗趨利敬富笑貧言語多類廣東婚姻俗浮澆習水戰好鬪喜寇掠市物少則用海貳多則用銀銀必經王鐵印印過每百兩入稅六錢方可通行無印紋卽私銀也三犯者或婦人多智凡事夫決於妻妻與中國人交恬不爲耻反以交多者爲榮男陽嵌銳鈴或一或三富者金銀貧者以銅行則有聲婚姻用僧取女紅帖男額上氣候常執無霜雪其譯語天爲普剌地爲佃因日爲脈月爲晚物產最饒小民多載舟往他國商販有金鋼錐薔薇露羅

斛香

味極清遠

奇木

其花鬚類黑漆匙筋以之飲食油膩不能汚偶以染茶隨手而消

白

鼠

毛白如雪

奇龜

足六

酒

暹羅爲第一

爲異

柯枝

柯枝古槃槃國也東連大山西南北皆海漢晉未通
宋梁時俱三遣使入貢隋大業中亦復遣使後絕獻
物有佛畫塔圖菩提樹葉舍利子我朝洪武中來
貢至永樂二年王可亦里遣使朝貢十年復遣使請
封其國大山詔從之是時太監鄭和使至其國國王
瑣里人也首纏黃白布上不衣下縈絲悅束絲壓腰
綴椰木葉苦屋國人五種曰南昆與王同類祝髮以

綿懸脰爲貴族次回回人大富有財者曰哲地次牙
繪曰革全又次卑賤者曰木瓜木瓜濱海穴居捕漁
爲業屋簷不得過三尺上水不過膝途遇南昆哲地
卽伏候過乃行王尚浮屠敬象牛建寺範金爲佛佛
座四旁砌成溝渠中穿一井每旦鳴鍾鼓汲井泉以
灌佛頂數回已乃禮之有曰濁肌者蓋道士流也不
剃胎髮髮縷縷垂後牛糞灰塗體亦取與女行吹大
螺妻隨之乞錢氣候常熱多雨五六月間大雨街市
成河至八月乃盡市用銀錢十五當金錢其山川鎮
國山

永樂二年封
賜牌文

產蓬蓬奈

肉紅味甘夷
人乾以附遠

珠寶香布

等物俱佳

討來思

討來思卽古赤土國也隋時通焉煬帝嗣位募能通絕域者大業三年屯田主事常駿虞部主事王君政等請使赤土帝大悅遣齋物五千段以賜赤土王駿等至於赤土之界其王遣婆羅門鳩摩羅以舶三十艘來迎吹蠡擊鼓爲樂更進金鑲以纜船月鑷金合二枚貯香油金瓶八枚貯香水白疊布四條以擬供使者盥洗其日未時那邪迦又將象二頭持孔雀蓋以迎使者并致金盤金花以藉詔函男女百人奏蠡

鼓婆羅門二人導路至王宮駿等奉詔書上閤王以
下皆坐宣詔說引駿等坐奏天竺樂事畢駿等遣婆
羅門就館送食以草葉爲盤具大方丈因謂駿曰今
是大國臣非復赤土國矣後數日請駿等入宴儀衛
導從如初見之禮王前設兩牀牀上豆設草葉盤方
一丈五尺上有黃白紫赤四色之餅牛羊魚鼈猪螻
蝻之肉百餘品延駿升牀從者於地席各以金鍾置
酒女樂迭奏禮遺甚厚遣那邪迦隨貢方物并獻金
芙蓉冠龍腦香以鑄金爲多羅葉隱起成文以爲表
金函封之令婆羅門以香花奏蠡鼓而送之駿以明

年春與那邪迦於弘農謁帝帝大悅授駿等執戟都尉那邪迦等官賞各有差以後不通中國我朝名討來思宣德六年遣人朝貢其國近山山下有水赤色望之如火杜氏通典載其王姓瞿曇氏名利富多塞不知有國遠近稱其父釋王位出家爲道傳位於利富多塞在位十六年矣其俗皆穿耳剪髮無跪拜之禮以香油塗身尚釋敬佛教重婆羅門婦人作髻於頂後男女通以朝霞朝雲雜色布爲衣豪富之室恣意華美唯金鑲非王賜不得服用每婚姻擇吉日女家洗期五日作樂飲酒父執女手以授婿七日乃

配既娶即分財別居唯幼子與父同居父母兄弟死則剔髮素服就水上構竹木爲棚棚內積薪以屍置上燒香建幡吹蠡擊鼓以送火焚薪遂落於水貴賤皆同唯國王燒訖收夾貯以金瓶藏於廟屋冬夏常濕雨多霽少其產甘蔗酒

雜以紫瓜根味絕美

龍腦香爲奇

沙哈魯

沙哈魯古投和國也隋時開馬唐貞觀中遣使奉表以金函盛之又獻金榼金鎮寶帶犀象海物等數十品自後未通我朝名沙哈魯永樂間七十七人來貢其地民淳耻鬪物產豐饒覆屋以瓦竝爲閣而居

屋壁皆以彩畫之。城內皆王宮室。城外人居可萬餘家。王宿衛之士百餘人。每臨朝則衣朝霞冠金冠耳挂金環頸挂金涎衣足履寶裝皮履。官屬有將軍功曹參軍州郡縣等官。號刑法盜賊多者。衣輕者穿耳及鼻并鑽鬚私鑄銀錢者。截腕國無賦稅俱隨意貢奉無多少之限。以農商爲業。國人乘象及馬一國之中馬不過千匹。又無鞍轡。唯以繩穿頰爲節制。音樂則吹蠡擊鼓。死喪則祠祀哭泣。又焚屍以麗盛之。沈於水中。若父母之喪則截髮爲孝。其國市物并貿易皆用銀錢。小如榆莢。有佛道有學校。文字與中夏不

同物產甚多交易海中諸國西域賈胡輒以廉價得
奇貨去沙哈魯人不識也

百花

百花古注輦國也自古未通中國宋祥符中國主茶
羅遣進奉使侍郎婆里三文等奉表來貢三文等以
盤捧真珠碧玻璃升殿布於御坐前降殿再拜譯者
導其言云十年來海無波濤故老相傳中國有聖人
故來入貢其國主衣鮮亦雅馴大略云伏惟皇帝陛
下功超邃古位建大中衣裳垂而保合乾坤劒戟鑄
而範圍區宇神武不殺人文化成廓明明之德以臨

御下民懷翼翼之心以昭事上帝至仁不傷於行葦
大信爰及於淵魚故得天鑒孔彰帝臨有赫顯今古
未聞之事保邦家不定之基竊念臣微類醯雞賤如
菊狗世居夷落地遠華風虛荷燭幽曾無執贄今者
竊聽訶頒普及遐陬限年屬於桑榆阻躬陳於玉帛
矧滄溟之曠絕在跋涉以稍難是敢傾倒赤心遙瞻
丹闕任土作貢同螻蟻之慕羶委質事君比葵藿之
向日謹遣使三文等五十二人奉土物朝貢云其
使離本國凡千一百五十日至廣州焉自是數來朝
貢其使自言願將上等珠就龍牀脚撒殿頂戴瞻禮

以申向慕之誠乃奉銀盤升殿跪散珠於御榻下而
退謂之撒殿以後來貢者遂以貢物撒殿爲常矣元
時未聞我朝謂之百花國多奇花故名洪武十一
年國王刺丁刺者望沙遣使朝貢其俗尚佛富饒民
有罪卽命侍郎一員處治之輕者繫於木格笞五七
十至一百重者則斬或以象踐殺之其宴則國王與
四侍郎膜拜於階遂共坐作樂歌舞不飲酒而食肉
俗衣布亦有餅餌嘗饌執事有婦人其兵陣用象屠
前小牌次之校槍次之長刀又次之弓矢在後四侍
郎分領其衆國東市約二千五百里有悉蘭池國時

相侵伐其產眞珠多牙珊瑚玻璃龜筒檳榔豆蔻吉
貝布獸有山羊黃牛白鹿紅猴禽有山雞鸚鵡倒挂
鳥果有餘甘山谷白生實如橄欖始嘗味酸飲水乃佳藤蘿千年棗椰子
甘羅崑崙梅婆羅密實生幹上形似冬瓜皮若栗多棘刺內肉層疊味佳子亦可炒
食花有白散絲蛇臍併桑麗秋青黃碧婆羅瑤蓮蟬
紫水蕉爲奇

答兒密

答兒密古丹眉流國也自古不通宋咸平初國王多
須機遣使九人來貢木香十斤鋤鑑各百斤胡黃連
三十五斤紫鉗百斤紅檀一合花布四疋蘇木萬斤

象牙六十一株召見崇德殿賜以冠帶服物及還又
賜多須機詔書以敦獎之我朝永樂中遣使十八
人來朝貢方物詔優禮之其俗以板爲屋跣足衣布
無紳帶以白紵纏其首貿易以金銀其主所居廣袤
五里無城郭出則乘象牙刑專用箠朴其產犀象榆石
紫鉶蘇木等物

淡巴

淡巴古狼牙脩國也梁時聞焉天監中遣使阿撒多
奉表辭皆佛語其言立國以來四百餘年後嗣衰
弱族有賢者國人歸向之王聞乃囚執之其鎖無故

自斷王以爲神不敢害逐之奔天竺天竺妻以女俄而狼牙王死大臣迎還爲王今上表者乃其子婆伽達多也自後不通于國我朝名淡巴洪武十年國王佛喝思羅遣使朝貢其國風景秀瞻地廣產多石城瓦屋王出入乘輿跨馬頗有威儀男女咸務耕織常業市有交易國無寇盜稱樂土矣物產大略與眞臘同

錫蘭山

以下俱東南西南海國其世次名號前代難考第以其通貢中國故備列之

錫蘭山在大海中永樂七年遣太監鄭和賞詔并賜物諭之其國王亞烈若奈兒瑣里人也負固不恭謀

害舟師和暗設兵器令衆夜半銜枚殺之入其宮生擒國王至九年獻俘闕下 朝廷赦之還國封國人所推耶巴乃那者爲王正統天順間輒遣使來貢其俗尚釋重象牛煨牛糞塗體飲牛乳不食其肉殺牛者死王宮民居旦必調牛糞塗室而後禮佛兩手直舒於前兩腿直伸於後胷腹皆著地而拜國富饒地廣人稠亞於爪哇人死用火化婚姻則親鄰婦人皆兩手齊拍胷乳而叫號哭泣爲賀男去鬚毫留髮女椎髻皆以布纏之上宜稻市用金錢所經海中有赤卵塢塢人穴居男女裸若野獸然食魚蝦及芭蕉子

傳云若有寸布在身卽生爛瘡昔釋迦佛過海於此地入水澡浴塢人盜其衣被釋迦呪誓以故至今人莫能衣其山川古蹟則翠藍山產諸寶石嶺有巨足跡云是盤古足跡也彼國人言寶石乃盤古淚液結成故有五色光彩浮沙中有螺蚌國王令人網取傾入珠池內作爛淘珠焉石跡海邊山有一盤石印足跡甚長四時用而貨也乃釋迦涅槃處其產青米藍石黃鴉鵲石青紅寶石每遇大雨衝流山下沙中拾取之龍涎香見爲奇

滿刺加

滿刺加永樂三年王西利八兒速刺遣人朝貢七年我遣太監鄭和賜印誥封爲王九年嗣王拜里迷蘇

刺率其妃子及陪臣五百四十人來朝 上御奉天
門宴王賜王并王妃及子侄賞各有差十二年國王
子母幹撒干的兒沙來朝告父卒 詔命嗣封以後
宣德天順成化時輒遣使來貢成化末給事中林榮
行人黃乾亨奉使冊封其王溺海歿各廕一子入監
讀書其地瘠鹵舊名五畧隸暹羅未稱國旣奉我正
朔遂不入暹羅貢俗淳朴尚回回教王白布纏頭身
穿細花番布如袍出入乘轎男方帕包頭女人撮髻
腦後俱上穿色布衫衫下圍白布各色手巾身膚黑
如漆間有白者唐人種也民舍如暹羅婚喪大類爪

陸地瘠少收人多以溪海取魚蚌爲業國有一山泉流
溪下民以溪中淘沙取錫煎銷成塊及織艾葦簞以
通市有龜龍四足長牙齒人又有黑虎能變人形入
市其譯語呼天爲安刺地爲布迷日爲哈利月爲補

藍其山鎮國西山

永樂中賜御製碑文

其產火雞

紫赤其子殼厚踰重錢或

斑或白鳥夷采之以爲飲蓋能食

火吐氣故各山出三佛齊者不同

黑熊黑猿曰麂波

羅密

見

撒打麻

樹脂結成者夜點有光塗舟水不入

艾葦簞

其葉織成簞子如荔

枝釀爲酒

靛黧

觀書可助目明

沙孤樹

取其皮搗作粉謂之沙孤米

爲奇

忽魯謨斯

忽魯謨斯永樂三年太監鄭和至其國國王遣人貢

獅子麒麟馬匹珍寶等物其地土沃民富人貌偉願
喜佛惡殺壘石爲城酋長深居練兵畜馬民亦壘石
爲屋有三五層者其廚廁臥室待客之所俱在上也
男拳髮長衫善騎射女編髮四垂帛繚其項耳挂環
玲腕腿俱金銀鍤以青石磨水粧點目唇花紋爲美
此富家之餘也婚姻所媒妁如中國禮市用銀錢國
法禁酒有造酒者棄市文武醫卜技藝之人絕勝他
國國中有大山山四面出四種物一面出鹽如紅礬
塊有重三四百斤者可碎之而食亦可刻爲器皿一
面出紅土色如銀礬一面出白土若石灰可以粉牆

一面出黃土色如薑黃王差人守管各處自有人來

收買爲用其產松子

長二寸許

葡萄乾

有三四樣一樣紫

色如蓬子無核

把脯果

似核

萬年棗

結霜如糖味

大尾羊

重者七八十斤尾闊尺餘重

鬬羊

前半戴毛

如剪淨者角上帶

草上飛

見前

福鹿

似驢而花

馬哈獸

牌人家畜之以鬬

角長

駝雞

見前

各色寶石各色美玉器皿各色水晶器

皿花毯番絲手巾爲奇

亞魯

亞魯小國也洪武初詔諭海南其國來貢俗淳朴言

語婚姻等事皆與瓜哇相同產飛虎

大如獅遍身灰色有肉翅好蜩

輦能飛金銀香見前爲奇

大俱喃

大俱喃小國也洪武初國王遣使入貢風俗醇朴男女俱纏頭長衫產青白磁器爲佳

小俱喃

小俱喃小國也永樂七年太監鄭和至其國國王遣使來貢其地田瘠而穀少歲籍榜葛刺米糧來食男少女多使用金錢其產惟麝香胡椒波羅密等物

亦思把罕

亦思把罕在西南海中永樂中遣四十四人朝貢地

廣千里四面皆海國有城堅壯王居侈麗厚俗朴
尚佛好施亦有中國人寄寓者

甘把里

甘把里小國也永樂間遣六人朝貢產薄民淳奉佛
不事積聚故雖貧無乞丐者

小葛蘭

小葛蘭小國也永樂中太監鄭和至其國王遣人朝
貢俗尚佛教尊敬象牛婚喪等事大類錫蘭山地亦
相近其產青羊

青毛足
高三尺

黃牛

重四五
百斤

爲奇

古里班卒

古里班卒小國也永樂三年國王遣使朝貢其地土瘠產薄氣候不齊夏則多雨多寒俗質朴男女披短髮假錦纏頭紅布繫身物產無奇

呂宋

呂宋小國也其地產黃金以故人亦富厚俗朴耻訟洪武永樂初俱遣使朝貢萬曆四年助討逋賊有功來貢貢道由福建入於正賞外加賜如朝鮮國

合猫里

合猫里小國也永樂三年國王遣使朝貢土瘠其地多山山外大海饒魚虫民知耕稼物產無奇

八
廣雅卷之六
三
磔里

磔里小國也永樂三年國王遣使朝貢其地人淳產薄尚佛耻訟

打回

打回小國也永樂三年來貢其國數爲鄰國所侵乃治兵器與鄰國戰稍得自立風俗略與上諸國同物產無奇

日羅夏治

日羅夏治小國也永樂三年遣人朝貢其地人頗知種藝崇佛少盜產惟蘇木胡椒與打回同

賓童龍

賓童龍小國也隸占城永樂中鄭和至其國其地風土人物草木物候與占城略同惟喪禮之事能持孝服設佛事而度死擇僻地而葬之此爲佳也其王乃占城選人爲之出入乘象馬張紅傘從者百人服飾亦與占城同歲貢方物與占城佛書言王舍城是也今有目蓮基址存焉亦有尸致魚其爲害比之占城更慘民多置廟牲血祭之其產惟奇南香各色花布爲奇

交攔山

交欄山小國也元時高興史弼征閩婆國遭風至其山下有病卒百餘留居其地生育至今皆其裔也我朝永樂中鄭和至其地米穀稀少射獵爲業男女椎髻短衫其產惟豹熊五色絹銅器青碗等物

刺撒

刺撒小國也永樂中鄭和至其國其地倚海而居壘石以爲城屋不生草木田瘠少收惟麥略有歷年無雨鑿井絞車以羊皮袋水男女拳髮長衫婦人粧點兜頭略與魯忽謨斯同其產惟龍涎乳香駱駝磁器等物

彭亨

彭亨在海島中洪武永樂間其王麻哈刺惹答饒俱遣使朝貢獻番奴及方物地多平原禽獸稀少草茂土沃物產無奇

論曰開闢之王貴在宣威承平之君戒於好大二者殊科要皆所以馭遠方而厚中國也昔漢武帝唐太宗俱值治安之世卽垂裳而蒞亦可以攝服諸夷顧乃越海泛槎搜奇索異一切方物珍而藏之以爲世寶此非徒好大也且以玩物矣用是後世有遺譏焉若我國家則不然蓋當胡孽不造我太祖驅椎結

而冠裳之自非來王來享則威不旁暢而朝廷不尊
於是卽位未幾 詔諭海南遣使絕域而暹羅柯枝
以下諸國甫聞 聖帝龍興貢琛恐後梯航繼踵球
珎盈廷所繇殆與漢唐二帝異矣厥在今日又安旣
久惟漢唐之轍是監毋騁虛名毋實異物何遠之難
格也昔益之戒曰毋怠毋荒四夷來王有味乎其
言之矣

渤泥

渤泥本閩婆屬國在西南大海中前代未通宋太平
興國中國王向打始遣使貢大片龍腦粟米龍腦荅

龍腦玳瑁檀香象牙其表以數重小囊緘封之非中國紙類木皮瑩滑色微綠而長數尺濶寸餘橫卷之僅可盈握其字小橫讀之詔優禮焉元至元中王錫理麻喏復遣使貢方物其使乞從泉州乘海船歸國從之我朝洪武四年王馬合謨沙遣使朝貢永樂三年遣使封其國王麻邪惹加那乃爲王六年王率其妃子及陪臣來朝是年至福建命中官往宴勞之令所過諸郡設宴至京王奉金字表獻方物妃箋獻尸宮東宮上御奉天門賜王宴王卒於會同館賜

順葬南京城外石子岡樹碑立祠有司春秋致

西南夷人隸籍中國者守之封其子遐旺嗣護
之歸國後十二年洪熙元年皆來朝貢俗以板爲城
以銅鑄甲狀若大筒室宇弘敞原田豐瞻習尚奢侈
敬愛華人君臣士民之服頗效中國其山川長寧鎮
國山御製碑文賜封其產有菜樹取其根煎爲膏服之及塗其體兵刃所傷皆不能死
片腦樹如杉檜取之者必齊沐而主其九似梅花者爲上貝多葉國人以貝多葉與竹編爲
食器食訖棄之吉貝樹也以其花織爲布加蒙樹心可爲奇
王居亦以覆屋

蘇祿

蘇祿其國王有三曰東王西王峒王惟東王爲尊永
樂十五年三王各率其妻子頭目朝貢後東王歸次

德州卒命有司營葬爲文立碑墓道置其妃從十餘人守墓畢三年還國十九年嗣王都麻舍來朝獻巨珠一顆重七兩五錢前古所罕見也其俗民食沙糊魚蝦螺蛤短髮纏皂綬煮海爲鹽釀柘爲酒其山川石崎山目以此爲保障其產青珠有至徑寸者形圓竹布小竹織成者爲奇

古麻刺

古麻刺永樂時國王哇來頓本率妻子及陪臣來朝行至福州卒賜諡康靖勅有司葬歲祀之其國有百餘州有城四重國人不葷食有佛宇四千區四萬餘

妓每日歌舞以獻佛飯王出入乘象戴金冠從者騎馬持劍隨之

論曰渤泥至宋始通蘇祿麻刺前史未載大抵皆慕華之國也我朝廷未煩一使而其王挈妻子臣屬越海獻瑗隕身萬里略無怨悔非甚盛德曷能俾之向化若此哉然賜諡立碑春秋享祀其憑藉中國寵靈亦足以誇示諸夷矣余嘉其事故合三國爲一論云

咸賓錄西夷志卷之六

終